

Ár 2019, þriðjudaginn 16. apríl, er dómþing Dómstóls Íþróttá- og Ólympíusambands Íslands (ÍSÍ) haldið af Sigurði I. Halldórssyni dómara í dómstól ÍSÍ að Síðumúla 13, Reykjavík.

Fyrir er tekið: Mál nr. 4/2019.

Keilulið ÍR-TT

gegn

KFR- Valkyrjur

Gögn málsins nr. 1-10 liggja frammi.

Er nú í réttinum kveðinn upp svofelldur

DÓMUR:

I.

Dómkröfur.

Málið var höfðað með kæru móttækinni af skrifstofu ÍSÍ þann 2. apríl sl. Undirrituðum dómara var falin meðferð málsins. Með tilkynningu þann 3. apríl sl. var kærða gefinn kostur á að skila greinargerð. Greinargerð kærða barst dómstólnum þann 10. apríl sl.

Kröfur kæranda: Kærandi krefst þess að úrslit í leik ÍR-TT og KFR-Valkyrja í Íslandsmóti liða KLÍ í 1. deild kvenna á keppnistímabilinu 2018 - 2019, sem leikinn var 30. mars 2019, verði breytt á þann veg að KFR-Valkyrjur tapi leiknum 0-14.

Kröfur kærða: Kærði krefst þess aðallega að kröfu ÍR-TT verði vísað frá og að úrslit leiksins verði látin standa óbreytt. Kærði krefst þess *til vara* að vera sýknaður af kröfu kærandi í málinu og að úrslit leiksins verði látin standa óbreytt.

II.

Málsatvik og málatilbúnaður málsaðila.

Málsatvik eru þau að þann 30. mars sl var leikinn deildarleikur milli liðanna ÍR-TT (kæranda) og KFR-Valkyrja (kærða). Samkvæmt leikskýrslu spilaði Marika Katarina E. Lönnroth í leiknum, en fyrsta leik sinn sem skráður er hjá KLÍ, spilaði hún í viðureign liðanna þann 11. febrúar sl. Umræddur leikmaður, sem hefur dvalið á Íslandi síðan í janúar 2014 hefur finnskan ríkisborgararétt, hafði sótt um og fengið leikheimild þann 14. janúar sl. Kærandi bendir á að eftir deildarleikinn sem var í lokaumferð deildarkeppninnar hafi komið til tals að Marika Katarina E. Lönnroth ætlaði ekki að taka þátt í keppni á Íslandsmóti einstaklinga þar sem hún væri ekki með íslenskan ríkisborgararétt. Voru það fyrstu vísbendingar sem kærandi fékk um að Marika Katarina væri ekki löglegur keppandi með liði KFR-Valkyrja og sem keppandi hjá KLÍ.

Málatilbúnaður og lagarök kæranda:

Skv. 13. gr. reglugerð KLÍ um Íslandsmót liða getur erlendur leikmaður ekki leikið með liði eftir lokun félagsskipta 1. febrúar hafi hann ekki leikið með liðinu fyrir 1. febrúar. Skv. 9. gr. sömu reglugerðar kemur fram að ef löglega skipað lið er ekki mætt til keppni við lok upphitunar skal viðureignin úrskurðuð því liði töpuð og það lið sem mætir skal fá stigin. Þá kemur fram í 5. gr. reglugerðar KLÍ um keilumót að ef lið notar leikmann sem hefur ekki leikheimild með liði skal umræddur leikur/viðureign dæmd því liði töpuð.

Skv. 7. gr. reglugerðar KLÍ um keilumót skal dómstóll ÍSÍ fjalla um kærsmål.

Krafa ÍR-TT er innan lögbundins kærufrests.

Með vísan til málsatvika og lagaraka telur ÍR-TT ljóst að úrslit leiksins hefðu átt að vera 14-0 ÍR-TT í vil.

Málatilbúnaður og lagarök kærða:

Varðandi aðalkröfu:

Samkvæmt 1. gr. reglugerðar KLÍ um keilumót eru samþykktir Alþjóðakeilusambandsins (FIQ/WTBA) bindandi fyrir KLÍ. Hluti samþykktu Alþjóðakeilusambandsins hefur þar að auki verið sérstaklega samþykktur sem almennar keppnisreglur KLÍ. Í gr. 3.9.1. í almennum keppnisreglum KLÍ kemur fram að mótmælum varðandi spilarétt eða almennar keppnisreglur verður að staðfesta skriflega við ábyrgan mótstjórnarmann eigi síðar en 24 klukkustundum eftir lok þess leiks sem brotið var framið í eða áður en verðlaunaafhending fer fram, hvort sem er fyrir.

Þó kærufrestur sé þannig 7 dagar samkvæmt reglugerð KLÍ um Íslandsmót liða er ljóst að mótmælum varðandi spilarétt, líkt og á við í hinu kærða tilviki, verður að staðfesta skriflega við ábyrgan mótsstjórnarmann eigi síðar en 24 klukkustundum eftir lok þess leiks sem brotið var framið í eða áður en verðlaunaafhending fer fram, hvort sem *er* fyrir.

Að mati kærða er einnig óumdeilt að engum slíkum mótmælum var komið skriflega á framfæri við ábyrgan mótsstjórnarmann vegna leiks sem leikinn var 30. mars sl. áður en verðlaunaafhending fór fram í Íslandsmóti liða kvenna. Kærða voru afhent verðlaun fyrir sigur í Deildakeppni kvenna í Íslandsmóti liða hið sama kvöld og leikurinn hinn 30. mars fór fram og engin gögn hafa verið lögð fram eða kærða er kunnugt um sem styðja að mótmælum varðandi spilarétt Mariku hafi verið staðfestar skriflega við ábyrgan mótsstjórnarmann áður en verðlaunaafhending fór fram.

Varðandi varakröfu:

Skv. 13. gr. reglugerð KLÍ um Íslandsmót liða getur erlendur leikmaður ekki leikið með liði eftir lokun félagsskipta 1. febrúar hafi hann ekki leikið með liðinu fyrir 1. febrúar. Samkvæmt 6. gr. reglugerðar KLÍ um keilumót getur erlendur ríkisborgari gerst leikmaður með íslensku keiluliði. Þá kemur fram í 4. gr. sömu reglugerðar að í einstaklings-, para- og tvímenningskeppni geti allir félagsbundnir keilarar verið þátttakendur, en einungis íslenskir ríkisborgarar geti unnið til verðlauna í ofangreindum íslandsmótum. Að mati KFR-Valkyrja verður að lesa framangreindar reglugerðir með hliðsjón af 2. mgr. 7. gr. móta og keppendareglna ÍSÍ sem segir að útlendingi sé heimil þátttaka í Íslandsmeistaramóti í flokkaíþróttum en þátttökurétt í Íslandsmeistaramóti í einstaklingsíþrótt öðlist erlendur ríkisborgari ekki fyrr en eftir a.m.k. þriggja ára samfellda búsetu hérlendis.

Markmið og tilgangur 13. gr. reglugerðar KLÍ um Íslandsmót liða er bersýnilega að koma í veg fyrir að lið sæki liðsauka erlendis frá erlendum ríkisborgurum sem ekki hafa lögheimili hérlendis, þegar stutt er eftir af keppnistímabilinu. Að mati kærða er ákvæðinu augljóslega ekki ætlað að koma í veg fyrir þátttöku ríkisborgara innan EES sem lögheimili hafa haft hér á landi undanfarin 5 ár með öllum þeim réttindum og skyldum sem því fylgir. Kærði heldur því raunar fram að slíkt fari í bága við þjóðréttarlegar skuldbindingar sem Ísland hefur tekist á hendur og lög og afleiddar reglur sem af lögfestingu EES samningsins leiðir sem og samningum tengdum réttindum norrænna ríkisborgara til að flytjast á milli landa.

Röksemdir:

Með vísan til málsatvika og lagaraka telur kærði aðallega að vísa eigi frá kröfum kæranda þar sem mótmælum varðandi spilarétt hafi ekki verið komið skriflega á framfæri við ábyrgan mótstjórnarmann innan tilsettra tímamarka.

Til vara telur kærði að sýkna beri í málinu sökum þess að reglan nái ekki til þess tilviks sem Marika fellur undir með vísun til lagaraka sem færð hafa verið fram. Ennfremur sé það mat kærða að reglan stangist á við réttindi EES og norrænna ríkisborgara sem lögheimili hafa haft hér um fjölda ára.

III.

Forsendur og niðurstöður.

Mál þetta er kært til Ípróttadómstóls ÍSÍ vegna meints brots kærða með því að nota ólöglegan leikmann í leik kæranda, Keiluliðs ÍR-TT og kærða, KFR -Valkyrjur, sem fram fóru þann 30. mars sl, í Íslandsmóti liða KLÍ 1. deild kvenna.

Þar sem Keilusamband Íslands hefur ekki sinn eigin dómstól er kærinni réttilega beint til dómstóls ÍSÍ með vísan til gr. 20.2 í lögum ÍSÍ.

Dómstóll ÍSÍ hefur ákveðið að skipta málinu í tvö mál þ.e. nr. 3/2019 og nr. 4/2019, með vísan til þess að samkvæmt aðalkröfu í kröfugerð kæranda reynir á kærufrest samkvæmt gr. 24.1. í lögum ÍSÍ, með ólíkum hætti, þar sem kærandi kærir úrslit í tveimur leikjum milli kæranda og kærða, sem fóru fram á mismunandi leikdögum.

Í máli nr. 3/2019 hefur þegar verið kveðinn upp úrskurður um frávísun.

Mál þetta varðar því leik málsaðila er fram fór þann 30 mars sl.

Vakið er athygli á að málavaxtalýsing og kröfugerð aðila tekur því tillit til þessarar málsmeðferðar.

Samkvæmt gr. 24.1 í lögum ÍSÍ er kærufrestur til dómstóls ÍSÍ ein vika frá því að atvik það, sem kært er bar við eða ástandi lauk ef um ástandsbrott er að ræða. Kærufrestur samkv. gr. 19 í reglugerð KLÍ um Íslandsmót liða eru 7 dagar.

Með vísan til þess að kæran barst skrifstofu ÍSÍ þann 2. apríl sl., vegna leiks sem fram fóru þann 30 mars sl., er kæran innan kærufrests samkv. gr. 24.1 í lögum ÍSÍ.

Skv. 13. gr. reglugerð KLÍ um Íslandsmót liða getur erlendum leikmaður ekki leikið með liði eftir lokun félagsskipta 1. febrúar hafi hann ekki leikið með liðinu fyrir 1. febrúar. Skv. 9. gr. sömu reglugerðar kemur fram að ef löglega skipað lið er ekki mætt til keppni við lok upphitunar skal viðureignin úrskurðuð því liði töpuð og það lið sem mætir skal fá stigin.

Þá kemur fram í 5. gr. reglugerðar KLÍ um keilumót að ef lið notar leikmann sem hefur ekki leikheimild með liði skal umræddur leikur/viðureign dæmd því liði töpuð.

Kærði vísar til almennra keppnisreglna KLÍ. Í gr. 3.9.1. í almennum keppnisreglum KLÍ kemur fram að *mótmælum varðandi spilarétt eða almennar keppnisreglur verður að staðfesta skriflega við ábyrgan mótsstjórnarmann eigi síðar en 24 klukkustundum eftir lok þess leiks sem brotið var framið í eða áður en verðlaunaafhending fer fram, hvort sem er fyrir.*

Að mati dómsins eiga þessar reglur ekki við um almennt hlutgengi til þátttöku í íþróttaiðkun á vegum ÍSÍ/KLÍ. Það er auk þess viðurkennt að til að ganga úr skugga um hlutgengi leikmanns/liðs hafi aðili sem í þessu tilviki hefur hug á að bera fyrir að um ólöglega skipað lið sé að ræða, eðlilegan frest til að ganga úr skugga um hlutgengi einstaklings eða liðs og er þar átt við daga en ekki klukkustundir.

Er því ekki fallist á þessar röksemdir kærða.

Varðandi röksemdir kærða fyrir varakröfu sinni bendir dómurinn á að umræddur leikmaður fékk fyrir lok félagaskipta eða þann 14. janúar sl., leikheimild með liði kærða.

Hins vegar þurfti umræddur leikmaður að uppfylla það skilyrði að leika með liði kærða á tímabilinu frá 14. janúar sl., eftir að hún fékk leikheimild og fyrir 1. febrúar, samkv. ákv. 13. gr. reglugerð KLÍ um Íslandsmót liða.

Dómurinn felst því ekki á röksemdir kærða fyrir varakröfu sinni.

Með vísan til ofanritaðs er fallist á dómkröfu kæranda um að lið KFR-Valkyrja hafi verið ólöglega skipað í leik liðanna þann 30. mars sl. og ber því að dæma Keiluliði ÍR-TT sigur í leiknum 0-14.

IV. Dómsorð.

Kæranda, Keiluliði ÍR-TT er dæmdur sigur í leik liðsins og liðs kærða, KFR-Valkyrjur, þann 30. mars 2019, 0-14.

Dómsorð er lesið í heyranda hljóði.

Aðilar hafa rétt til að áfrýja máli til áfrýjunardómstóls ÍSÍ í eina viku frá því að aðila máls var fyrst kunnugt um niðurstöðu málsins, en þó eigi síðar en 4 vikum eftir að dómur var upp kveðinn, sjá gr. 33.3 í lögum ÍSÍ.

Dómþingi slitið
Sigurður I. Halldórsson

